


## Borgarráð

### *Tillögur að breytingum á skipulagi stjórnsýslu Reykjavíkurborgar*

Lagt er til að borgarráð samþykki eftirfarandi 11 tillögur um skipulag stjórnsýslu Reykjavíkurborgar, sem hafa það að meginmarkmiði að einfalda, skýra og skerpa stjórnarhætti Reykjavíkurborgar:

1. Lagt er til að eftirfarandi skipurit stjórnsýslu Reykjavíkurborgar taki gildi 1. júní 2019.



2. Lagt er til að þrjú kjarnasvið verði stofnuð; svið þjónustu og nýsköpunar, svið mannaúðs og starfsumhverfis og svið fjármála og áhættustýringar. Sviðin taki við stórum hluta af þeim verkefnum sem nú er sinnt á skrifstofum miðlægrar stjórnsýslu Reykjavíkurborgar. Breytingar verði einnig gerðar á verkefnum og verkaskiptingu skrifstofa í miðlægrri stjórnsýslu, þ.e. á skrifstofu borgarstjórnar og skrifstofu borgarstjóra og borgarritara. Mannréttindaskrifstofa fái heitið mannréttinda- og lýðræðisskrifstofa og heyri undir borgarritara. Jafnframt fái

mannréttinda- og lýðræðisráð heitið mannréttinda-, nýsköpunar- og lýðræðissráð til að undirstrika tengingu ráðsins við nýtt svið þjónustu og nýsköpunar sem og áframhaldandi tengingu við mannréttinda- og lýðræðisskrifstofu og þá málaflokka sem þar falla undir. Staðsetning innri endurskoðunar og umboðsmanns borgarbúa í skipuriti Reykjavíkurborgar verði beint undir borgarráði til að undirstrika stöðu og óhæði þeirra innan stjórnkerfisins. Nánari útfærsla á verkaskiptingu milli fagsviða, kjarnasviða og skrifstofa miðlægrar stjórnsýslu verður unnin á innleiðingartíma breytinganna sbr. lið 10.

3. Lagt er til að framkvæmdastjórn Reykjavíkurborgar verði formlega sett á laggirnar og starfsemi hennar og hlutverk verði skilgreint í sérstakri samþykkt sem lögð verður fyrir borgarráð fyrir 1. júní nk. Í framkvæmdastjórn eigi sæti helstu stjórnendur Reykjavíkurborgar undir forystu borgarstjóra.
4. Lagt er til að innkauparáð fái aukið hlutverki og verði frá og með 1. júní nk. nefnt innkaupa- og framkvæmdaráð og verði skipað fimm fulltrúum. Ráðið hafi auk núverandi hlutverks skýrt hlutverk þegar kemur að framkvæmdum á vegum Reykjavíkurborgar og jafnframt aukið eftirlitshlutverk með innkaupum og útboðum á vegum Reykjavíkurborgar. Nánari útfærsla á hlutverkum og verkefnum hins nýja ráðs verði unnin á innleiðingartíma breytinganna.
5. Lagt er til að starf regluvarðar Reykjavíkurborgar verði aukið og ráðið verði í fullt starf regluvarðar síðar á þessu ári. Hlutverk regluvarðar verður auk verkefna sem tengjast skráningu skuldabréfa Reykjavíkurborgar á verðbréfamarkaði að sinna fræðslu til stjórnenda og kjörinna fulltrúa svo þeir geti sem best uppfyllt skyldur sínar. Jafnframt að fylgjast með og meta reglulega hæfi og skilvirkni stjórnarháttanna í samræmi við gildandi lög, reglugerðir, samþykktir og innri reglur. Metið verði á innleiðingartíma hvar best henti að staðsetja regluvörð í skipulagi stjórnsýslu Reykjavíkurborgar. Sama á við um starf persónuverndarfulltrúa sem í dag er staðsettur á skrifstofu borgarstjóra og borgarritara.
6. Lagt er til að fjármálaskrifstofa, skrifstofa þjónustu og reksturs og skrifstofa eigna og atvinnuþróunar verði lagðar niður frá og með 1. júní nk. Jafnframt er lagt til að starf fjármálastjóra, starf skrifstofustjóra skrifstofu þjónustu og reksturs og starf skrifstofustjóra skrifstofu eigna og atvinnuþróunar verði lögð niður frá og með sama tíma.
7. Lagt er til að stöður nýrra sviðsstjóra fjármála- og áhættusviðs og sviðsstjóra mannauðs- og starfsumhverfissviðs Reykjavíkurborgar verði settar á laggirnar og auglýstar lausar til umsóknar í samræmi við reglur borgarráðs um ráðningar í ædstu stjórnunarstöður. Jafnframt verði sett á laggirnar ný staða sviðsstjóra þjónustu- og nýsköpunarsviðs. Lagt er til að núverandi skrifstofustjóra skrifstofu þjónustu og reksturs verði boðið starf sviðsstjóra nýs sviðs þjónustu og nýsköpunar í samræmi við heimild í reglum um réttindi og skyldur stjórnenda hjá Reykjavíkurborg.
8. Lagt er til að á innleiðingartíma breytinganna verði unnið að viðeigandi breytingum á samþykktum Reykjavíkurborgar og þær lagðar fyrir borgarstjórn til samþykktar tímanlega fyrir gildistöku breytinganna 1. júní nk. Jafnframt verði skipulag og verkefni nýrra kjarnasviða mótað og skipulag og verkefni skrifstofu borgarstjórnar, mannréttinda- og lýðræðisskrifstofu og skrifstofu borgarstjóra og borgarritara endurskoðað. Loks er lagt til að erindisbréf nýrra sviðsstjóra verði mótuð og gildandi starfslýsingar/erindisbréf annarra stjórnenda endurskoðuð í samræmi við breytt skipulag og breytta verkaskiptingu.
9. Lagt er til að á innleiðingartíma framangreindra breytinga verði unnið frekar úr ábendingum og tillögum sem fram koma skýrslu Strategíu um endurskoðun skipurits og stjórnarháttanna

Reykjavíkurborgar. Þar á meðal eru atriði sem snúa að verkaskiptingu milli borgarstjórnar og borgarráðs, milli borgarráðs og fagráða, fyrirkomulagi upplýsingamiðlunar frá borgarstjóra og framkvæmdastjórnar til borgarráðs og borgarstjórnar og frá sviðsstjórum til framkvæmdastjórnar og ráða og nefnda, ásamt öðrum úrbótatillögum og hugmyndum sem reifaðar eru í skýrslunni. Vinnu við þá yfirferð verði lokið á síðari hluta þessa árs.

10. Lagt er til að formaður borgarráðs hafi yfirumsjón og eftirlit með innleiðingu breytinganna ásamt forseta borgarstjórnar. Borgarritari verði þeim til aðstoðar og tryggi innleiðingu breytinganna sem taka gildi 1. júní nk. Settir verði á laggirnar innleiðingarhópar sem haldi utan um einstaka þætti breytingaferilsins og hugi m.a. að samvinnu og samstarfi við starfsfólk og stjórnendur á hverjum stað. Stjórnendur á hverju kjarnasviði og skrifstofum hafa það hlutverk að stilla upp tillögum að skipulagi sinna eininga sem skal verða tilbúið fyrir 1. júní nk. Leitað verði til utanaðkomandi ráðgjafa sem sérfróðir eru á sviði innleiðingar breytinga og stjórnarháttanna sem og sérfræðinga í innri og ytri upplýsingamiðlun í tengslum við breytingar, stjórnendum og innleiðingarteymum til aðstoðar.
11. Lagt er til að settur verði á laggirnar stýrihópur sem hafi það hlutverk að móta almenna eigendastefnu Reykjavíkurborgar gagnvart b-hluta félögum þar sem m.a. verði að finna kröfur um stjórnarhætti b-hluta félaga, meðferð atkvæðisréttar, form og efnisreglur samskipta við stjórnir og stjórnendur félaganna o.fl. Stýrihópurinn skili tillögum sínum að almennri eigendastefnu Reykjavíkurborgar til borgarráðs fyrir árslok 2019.

## **Greinargerð:**

### *Almennt*

Á fundi borgarráðs 25. október sl. var samþykkt að setja í gang vinnu undir stjórn formanns borgarráðs við endurskoðun á skipulagi stjórnsýslu Reykjavíkurborgar. Lagt var upp með að endurskoðunin miðaði að því að einfalda skipulag og skipurit Reykjavíkurborgar og einnig að því að draga fram þau áhersluatriði sem mikilvægt væri að horfa til við stjórnun og rekstur Reykjavíkurborgar. Þau atriði sem þar voru sérstaklega tilgreind voru á sviði fjármálastjórnunar, innkaupa, eftirlits og áhættustjórnunar, þjónustu og nýsköpunar, á sviði mannauðsmála og heilsuefingar og síðast en ekki síst á sviði stjórnsýslu, þar á meðal á sviði stefnumótunar, gagnamála og upplýsingamiðlunar.

Lagt var til að leitað yrði til utanaðkomandi ráðgjafa sem sérfróðir eru á þessu sviði og að vinnan yrði unnin í samráði við stjórnendur og starfsmenn eftir því sem við á. Vinna við þetta verkefni var þegar sett í gang og samið við ráðgjafafyrirtækið Strategíu um ráðgjöf að undangenginni verðkönnun.

Skýrsla Strategíu liggur nú fyrir sem og framangreindar tillögur um breytingar á skipulagi stjórnsýslu Reykjavíkurborgar, sem unnar eru á grundvelli tillagna ráðgjafafyrirtækisins. Umræddar tillögur gera ráð fyrir nýju skipuriti stjórnsýslu Reykjavíkurborgar, en eins og tillögurnar bera með sér snúa þær fyrst og fremst að breytingum á miðlægri stjórnsýslu Reykjavíkurborgar. Eins og fram kemur í skýrslu Strategíu var rætt við fjölmarga aðila innan stjórnsýslu Reykjavíkurborgar, bæði lykilstjórnendur og kjörna fulltrúa. Eins og þar er rakið liggur gríðarmikið efni sömuleiðis undir sem geymir upplýsingar um fjölmörg atriði, þar á meðal fyrri skýrslur um stjórnskipulag Reykjavíkurborgar, skýrslur og ábendingar Innri endurskoðunar, gildandi stefnur Reykjavíkurborgar og svona mætti áfram telja. Á grunni alls þessa efnis, greiningu á því sem og viðtölum við stjórnendur og kjörna fulltrúa byggir skýrslan og þær tillögur sem hér eru gerðar.

Í þessum ellefu tillögum sem nú eru lagðar fram eru meginlínur lagðar í skipulagi og verkaskiptingu innan stjórnsýslu Reykjavíkurborgar. Nánari útfærsla á staðsetningu og skipulagi einstakra verkefna verður unnin nánar á innleiðingartíma breytinganna og við uppsetningu á skipulagi og verkefnum

einstakra nýrra sviða, eldri sviða og skrifstofa miðlægrar stjórnsýslu. Svo viðamikil breyting á skipulagi stjórnsýslu Reykjavíkurborgar krefst mikils undirbúnings og utanumhalds enda þarf að huga að fjölmörgum atriðum í því sambandi. Gerir tillagan ráð fyrir því að yfirumsjón verkefnisins verði í höndum formanns borgarráðs, forseta borgarstjórnar og borgarritara sem leiðir innleiðingarteymi sem taka munu að sér afmarkaða þætti þeirra verkefna sem framundan eru.

Breytingarnar miða að því að einfalda, skýra og skerpa stjórnarhætti Reykjavíkurborgar. Horft er til þess að umboð og hlutverk einstakra eininga sé skýrt skilgreint, sem og ábyrgð og framkvæmd tiltekinna verkefna, og að ákvarðanatataka taki mið af hlutverki, ábyrgð og framkvæmd. Skýrsla Strategíu geymir nákvæmari tillögur og útfærslu á verkaskiptingu en þær tillögur sem hér eru lagðar fram, og ekki hefur verið tekin afstaða til allra þeirra atriða sem nefnd eru þar. Astæðan fyrir því er sú að eðlilegt er við nákvæma útfærslu á verkaskiptingu innan og á milli eininga og sviða, að leita eftir sjónarmiðum starfsmanna og stjórnenda, þ.e. þeirra sérfræðinga sem í dag og í nýju skipulagi munu sinna þeim fjölbreyttu verkefnum sem tilheyra miðlægrri stjórnsýslu Reykjavíkurborgar. Gert er ráð fyrir að slík nánari útfærsla verði unnin á næstu vikum og mánuðum og lokið fyrir gildistöku nýs skipulags 1. júní nk.

Svo umfangsmiklar breytingar á skipulagi leiða óhjákvæmilega til þess að verkefni og þar með starfsmenn verða að einhverju marki fluttir á milli eininga og/eða til í skipuriti og skipulagi. Í þessari tillögu felst að þrjár stöður skrifstofustjóra verða formlega lagðar niður sem og þrjú ný kjarnasvið. Jafnframt verða þrjár stöður nýrra sviðsstjóra kjarnasviða settar á laggirnar sem og þrjú ný kjarnasvið. Ekki er útilokað endurskoðun á verkaskiptingu og skipulagi einstakra eininga, sem fer í gang verði framangreindar tillögur samþykktar, muni fela í sér niðurlagningu/breytingu á einstaka stöðum stjórnenda eða starfsmanna. Engu að síður er miðað við að slíkt verði í lágmarki, með hagsmunum starfsmanna og stjórnenda að leiðarljósi og þar með starfseminnar í heild sinni.

Ekki er gert ráð fyrir því að tillögur þessar feli í sér kostnaðaraukningu fyrir Reykjavíkurborg. Fyrir liggur að kostnaður mun falla til í tengslum við breytingar, þar á meðal vegna breytinga innan kerfa Reykjavíkurborgar, tilflutnings á starfsfólki o.s.frv. Þá er ljóst að kostnaður mun falla til vegna utanaðkomandi ráðgjafar. Búast má við að hann verði á bilinu 10-15 m.kr. á þessu ári. Hvað annan kostnað varðar er gert ráð fyrir því að hann muni á þessu ári rúmast innan fjárheimilda miðlægrar stjórnsýslu og til lengri tíma litið muni sú einföldun sem hér er boðuð á skipulagi og stjórnsýslu Reykjavíkurborgar leiða af sér hagkvæmari og betri stjórnsýslu.

*Athugasemdir við einstakar tillögur*

**Tillaga 1 og 2 – nýtt skipurit og stofnun kjarnasviða.** Lagt er til að skipuritið nýja taki gildi 1. júní nk. Helstu breytingar á því frá gildandi skipuriti snúa fyrst og fremst að miðlægrri stjórnsýslu Reykjavíkurborgar. Rauði þráðurinn í þeirri endurskipulagningu sem hér er lögð til er að einfalda og skýra boðleiðir, skýra umboð og ábyrgð og skerpa á hlutverki lykileininga. Verkefni sem þar hefur verið sinnt verða að stórum hluta flutt til þriggja nýrra kjarnasviða. Verkefni þeirra eininga sem eftir standa í miðlægrri stjórnsýslu verða endurskoðuð. Lagt er til að mannréttindaskrifstofa fái heitið mannréttinda og lýðræðisskrifstofa og heyri undir borgarritara eins og nú er, en verði ekki færð undir skrifstofu borgarstjórnar eins og lagt er til í skýrslu Strategíu. Tillagan felur einnig í sér að skrifstofa eigna og atvinnuþróunar er lögð niður og verkefni hennar færð til nýs fjármálasviðs, nýs þjónustusviðs, umhverfis- og skipulagssviðs og á skrifstofu borgarstjóra og borgarritara. Í því felst í grófum dráttum að nýtt fjármálasvið taki m.a. við fjárfestingarætlun, framkvæmd kaupa og sölu eigna, rekstur fasteigna o.fl. fari til sviðs þjónustu og nýsköpunar, framkvæmdir og viðhald fari til umhverfis- og skipulagssviðs og borgarþróunarverkefni og önnur atvinnuþróunarverkefni sem og tillögu- og samningagerð vegna lóðamála fari til skrifstofu borgarstjóra og borgarritara. Nýtt svið þjónustu og nýsköpunar mun að stofni til taka yfir þau verkefni sem hafa verið í höndum skrifstofu þjónustu og reksturs en þar er einnig lagt til að sérstaklega verði horft til nýsköpunar. Nýtt svið fjármála og áhættustýringar mun taka við þeim verkefnum sem fjármálaskrifstofa hefur haft með höndum, að því frátöldu að kjaramál munu flytjast til nýs sviðs mannauðs og starfsumhverfis. Þar til

viðbótar verður mannauðsdeild miðlægrar stjórnsýslu stofninn í nýju sviði mannauðs og starfsumhverfis og nýr mannauðsstjóri Reykjavíkurborgar líkt og aðrir sviðsstjóra kjarnasviða hluti af framkvæmdastjórn Reykjavíkurborgar. Tillagan gerir ráð fyrir að mannréttinda- og lýðræðisráð fái nýtt heiti; mannréttinda-, nýsköpunar- og lýðræðisráð, til að undirstrika tengingar ráðsins við nýtt svið þjónustu og nýsköpunar sem og mannréttinda- og lýðræðisskrifstofu. Skrifstofa borgarstjóra og borgarritara og skrifstofa borgarstjórnar munu áfram starfa en í breyttri mynd og með breyttum verkefnum að hluta. Þannig er gert ráð fyrir að þrjár deildir sem í dag tilheyra skrifstofu borgarstjóra og borgarritara verði færðar til í nýju skipulagi. Í skýrslu Strategíu er t.d. lagt til að Borgarskjalasafn tilheyri nýju kjarnasviði þjónustu og nýsköpunar og deild tölfraði og greiningar færist a.m.k. að hluta til nýs fjármálasviðs. Þá felur þessi tillaga í sér að verkefni mannauðsdeildar verði sinnt af nýju mannauðssviði sbr. framangreint. Strategía leggur til í sinni skýrslu að skipulag og framkvæmd upplýsingamála verði endurskoðuð í heild sinni og verður unnið að nánari útfærslu þess á innleiðingartímanum. Þá er í skýrslu Strategíu lagt til að skrifstofu borgarstjórnar verði gert betur kleift að sinna kjarnaverkefnum sínum sem snúa einkum að þjónustu og stuðningi við borgarfulltrúa og nefndir og ráð borgarinnar, en lagt til að ýmsum stjórnsýsluverkefnum verði fundinn annar staður. Mörg nánari útfærsluatriði varðandi staðsetningu einstakra eininga og jafnvel einstakra starfsmanna eru eftir og verða unnin á þeim rúmlega þriggja mánaða innleiðingartíma sem framundan er miðað við gildistöku nýs stjórnskipulags 1. júní nk. Loks skal nefnt að staðsetning innri endurskoðunar og umboðsmanns borgarbúa í skipuritinu er beint undir borgarráði til að undirstrika stöðu og óhæði þeirrar starfsemi. Í gildandi skipulagi er óhæðið táknað með brotnum línunum.

**Tillaga 3 – framkvæmdastjórn Reykjavíkurborgar.** Ein af lykiltillögum í skýrslu Strategíu er að fastara formi verði slegið um framkvæmdastjórn Reykjavíkurborgar. Hún hefur áður ekki verið sérstaklega skilgreind með þeim hætti sem hér er lagt til eða rammi settur utan um störf framkvæmdastjórnar. Miðar þessi tillaga að því að skýra og skerpa hlutverk og ábyrgð framkvæmdastjórnarinnar, formfesta fundi hennar, upplýsingamiðlun og upplýsingagjöf sviðsstjóra til framkvæmdastjórnar og borgarstjóra og þaðan til m.a. borgarráðs og borgarstjórnar. Jafnframt verður þarna til formlegur vettvangur fyrir æðstu stjórnendur Reykjavíkurborgar til samræmingar og upplýsingagjafar þvert á stjórnkerfi borgarinnar.

**Tillaga 4 – innkaupa- og framkvæmdaráð.** Tillaga þessi gerir ráð fyrir því að hlutverk innkauparáðs verði aukið og að fjölgað verði í ráðinu úr 3 fulltrúum í 5. Mikilvægt er að efla og treysta eftirlit með innkaupum, útboðum og framkvæmdum og felur þessi efling ráðsins það í sér. Tillagan gerir ráð fyrir því að unnið verði að því fyrir 1. júní nk. að útfæra nánar verkefni og hlutverk nýs ráðs. Í þeirri vinnu er mikilvægt að huga einnig að breytingum á lagaumhverfi opinberra innkaupa sem taka munu gildi á sama tíma.

**Tillaga 5 – regluvörður.** Tillaga þessi gerir ráð fyrir því að auka umtalsvert hlutverk regluvarðar og færa þar jafnframt undir verkefni sem áður hefur verið sinnt víða innan kerfis Reykjavíkurborgar. Horft er til þess að regluvörður hafi bæði fræðslu og leiðbeiningarhlutverk gagnvart stjórnendum og kjörnum fulltrúum að gegna, og geti komið að mati og ráðleggingum á ýmsum atriðum sem falla undir verksviðs starfsins og lúta að stjórnkerfi og verkefnum Reykjavíkurborgar. Tillagan gerir ráð fyrir því að ráðið verði í starfið síðar á þessu ári og samhliða nánari mótun þess verði ákvörðun tekin um staðsetningu regluvarðar innan stjórnkerfis Reykjavíkurborgar. Sama á við um staðsetningu starfs persónuverndarfulltrúa skv. persónuverndarlögum, sem í dag er staðsettur á skrifstofu borgarstjóra og borgarritara.

**Tillaga 6 – niðurlagning á þremur skrifstofum og stöðum þriggja skrifstofustjóra.** Þrjár skrifstofur í miðlægrri stjórnsýslu verða lagðar niður við gildistöku nýs skipurits. Um er að ræða fjármálaskrifstofu, skrifstofu eigna og atvinnuþróunar og skrifstofu þjónustu og reksturs. Einnig er lagt til að stöður skrifstofustjóra á viðkomandi skrifstofum verði lagðar niður. Nú þegar eru tvær af þessum stöðum lausar; staða fjármálastjóra þar sem núverandi fjármálastjóri mun brátt láta af störfum vegna aldurs, og staða skrifstofustjóra skrifstofu eigna og atvinnuþróunar. Eins og tillaga 7 ber með sér er gert ráð fyrir að bjóða núverandi skrifstofustjóra skrifstofu þjónustu og reksturs að taka við

stöðu nýs sviðsstjóra sviðs þjónustu og nýsköpunar, í samræmi við heimild í reglum um réttindi og skyldur stjórnenda hjá Reykjavíkurborg.

**Tillaga 7 – stöður þriggja sviðsstjóra kjarnasviða settar á laggirnar.** Í samræmi við tillögu að nýju skipuriti er lagt til að stöður þriggja sviðsstjóra kjarnasviða verði settar á laggirnar. Jafnframt er lagt til að tvær verði auglýstar lausar til umsóknar en einum skrifstofustjóra, sbr. umfjöllun hér að framan, boðin staða sviðsstjóra sviðs þjónustu og nýsköpunar.

**Tillaga 8 – endurskoðun samþykktar, skipulag sviða og skrifstofa og endurskoðun erindisbréfa.** Tillaga um breytingar á skipulagi stjórnsýslu felur í sér að huga þarf að fjölmörgum atriðum í gildandi samþykktum Reykjavíkurborgar. Jafnframt þarf að stilla upp skipulagi nýrra kjarnasviða og endurskoða skipulag þeirra skrifstofa sem áfram munu starfa með breyttum verkefnum og skipulagi. Loks þarf að endurskoða erindisbréf stjórnenda og starfsmanna. Horft er til þess að nýir stjórnendur kjarnasviða og stjórnendur á einstaka skrifstofum leiði þessa vinnu með aðkomu innleiðingarteyma og utanaðkomandi ráðgjafa.

**Tillaga 9 – úrvinnsla úr tillögum og ábendingum í skýrslu Strategíu.** Eins og rakið er í tillögnum geymir fyrirbyggjandi skýrsla Strategíu um endurskoðun skipurits og stjórnarhátta Reykjavíkurborgar ýmsar ábendingar og tillögur sem snúa að samspili milli borgarstjórnar og ráða o.m.fl. Lagt er til að þetta verkefni verði unnin frekar á þessu ári og nánari umbótatillögur mótaðar.

**Tillaga 10 – stjórnun og skipulag breytingaferils.** Hér er fjallað um hvernig haldið verður utan um það flókna ferli breytingastjórnunar sem nú er framundan. Lagt er til að stjórnun þess verði í höndum formanns borgarráðs, forseta borgarstjórnar og borgarritara, með uppsetningu innleiðingarteyma og aðstoð utanaðkomandi ráðgjafa.

**Tillaga 11 – almenn eigendastefna Reykjavíkurborgar.** Síðasta tillagan snýr að því að skilgreina í almennri stefnu hlutverk Reykjavíkurborgar sem eiganda b-hluta fyrirtækja. Tekur það bæði til fyrirtækja á borð við Orkuveitu Reykjavíkur sem og byggðasamlaga á borð við Strætó. Tillagan miðar að því að skýra og skerpa allt verklag í kringum samskipti við umrædd félög og almennar línur varðandi stjórnarhætti, sem þar líkt og hjá Reykjavíkurborg eiga að vera til fyrirmyndar.

Þórdís Lóa Þórhallsdóttir, formaður borgarráðs

Hjálagt:

Endurskoðun skipurits og stjórnarhátta Reykjavíkurborgar, dags. janúar 2019, skýrsla Strategíu.